

UCAPAN YAB PERDANA MENTERI,
DATO HUSSEIN ONN, MENGADAP
KE BAWAH DULI YANG MAHA MULIA
SERI PADUKA BAGINDA YANG DI PERTUAN
AGONG, SEMPERNA DENGAN HARI KEPU-
TERAAN BAGINDA PADA 7HB JUN,
1978 - JAM 10.00 PAGI.

Mengadap ke Bawah Duli Yang Maha Mulia
SeriPaduka Baginda Tuanku Yahaya
Petra Ibni Almarhum Sultan Ibrahim,
Yang Dipertuan Agong Malaysia,
Ampun Tuanku.

Pada hari dan saat yang bertuah
lagi berbahagia ini patek bagi pihak diri
patek sendiri, serta bagi pihak Kerajaan
dan rakyat jelata, dengan beberapa hormat
takzim dan dengan perasaan penuh taat setia,
menyembahkan ucapan setinggi-tinggi tahniah
kepada ke bawah Duli Yang Maha Mulia Tuanku
sempena dengan Hari Keputeraan Baginda
Tuanku hari ini.

2. Patek pacal sekelian, dengan amat sukacita serta dengan penuh semangat kesedaran, merefakkan sembah membaharui ikrar taat setia yang tidak berbelah bagi, untuk terus menjunjung serta mempertahankan kedaulatan dan kemuliaan Ke bawah Duli Tuanku pada setiap masa.

3. Patek sekelian sentiasa berdoa kehadiran Allah Subhanahu Wataala, mudah-mudahan dengan limpah kurniaNYA, dilanjutkan usia zaman Ke bawah Duli Tuanku serta Baginda

Raja Permaisuri Agong dalam sihat wal'afiat, supaya dapat kekal memerintah di atas singgahsana takhta Kerajaan dengan bertambah-tambah daulat dan berkat.

Ampun Tuanku,

4. Sesungguhnya patek pacal sekelian sentiasa menjunjung tinggi hormat serta menghargai di atas khidmat cemerlang dan minat yang kuat yang ditunjukkan oleh Duli Yang Maha Mulia Baginda Tuanku, mengambil

..4/-

berat terhadap kebajikan dan kemajuan rakyat dan penduduk di negara ini, terutama mereka yang miskin dan daif. Minat dan kecenderungan yang Baginda Tuanku lahirkan itu, terutama mengenai pelaksanaan rancangan-rancangan pembangunan dan Dasar Ekonomi Baru, telah memberi semangat dan perangsang yang lebih kuat kepada patek khasnya, dan Menteri-Menteri, Timbalan-Timbalan Menteri serta pegawai dan kakitangan Kerajaan amnya, untuk berusaha dengan lebih bersungguh-sungguh lagi, bagi mencapai matalamat kejayaan yang lebih tinggi.

5. Patek pacal sekelian amat sukacita kerana seiak *Ke Bawah Duli Tuanku* bersemayam diatas takhta Kerajaan, banyak kemajuan dan kejayaan telah diperolehi. Kerajaan akan terus meningkatkan usaha bagi membasmi kemiskinan di kalangan rakyat jelata, tanpa mengirakaum,serta menyusun semula masyarakat berbilang kaum, supaya negara dapat melahirkan sebuah masyarakat yang lebih adil, progresif, makmur dan bersatupadu.

6. Kerajaan pada tahun ini sedang menjalankan kajian pertengahan pengqal

Rancangan Malaysia Ketiga, bagi meneliti kejayaan dan kemajuan sebenarnya yang telah diperolehi, dalam pelaksanaan rancangan dan projek pembangunan. Disamping itu, Kerajaan juga sedang mengambil tindakan meningkatkan lagi prestasi jentera pelaksanaannya, bagi menampung keperluan yang semakin bertambah, supaya matalamat yang telah ditetapkan itu, dapat dicapai sepenuhnya, dan harapan tinggi rakyat, terutama golongan miskin, untuk menikmati kemajuan dan kemakmuran dapat dipenuhi dengan lebih berkesan lagi.

7. Alhamdulillah dengan berkat kebijaksanaan pemerintahan Kebawah Duli Tuanku serta kejayaan pelaksanaan dasar-dasar Kerajaan, perpaduan di kalangan rakyat berbilang kaum, yang memang telah sedia terjalin, dan yang memang menjadi amalan tradisi keturunan di masa lalu, telah dapat terus diwujudkan, teguh dan kukuh. Ini merupakan sumbangan yang paling penting kearah kestabilan politik dan keselamatan di tanah air kita. Inilah faktor utama bagi menarik pelaburan dari luar negeri.

8. Patek pacal sekelian sentiasa sedar terhadap tanggungjawab dan kewajipan patek sebagai warganegara yang taat setia kepada Kebawah Duli Tuanku dan negara Malaysia yang dikasihi, memelihara dan mengekal serta mengeratkan perpaduan negara ini, bagi menjamin keselamatan negara serta memastikan supaya kemajuan dan kemakmuran yang telah diperolehi setakat ini, tidak akan terjejas malahan dapat terus ditingkatkan lagi.

9. Sesungguhnya rakyat sangat terhutang budi kepada anggota-anggota pasukan keselamatan

kita, yang telah bertugas dengan cekap dan berani, serta mengorbankan jiwa raga mereka, bagi mempertahankan kedaulatan dan kemerdekaan negara serta menjamin keselamatan dan ketenteraman di tanahair kita. Patek pacal sekelian sentiasa berdiri tegoh dibelakang barisan pertahananini, dan jika perlu akan bersama-sama turut berjuang bagi mempertahankan negara kita, serta mempertahankan sistem hidup bebas yang telah kita amalkan sejak zaman berzaman itu. Tidak ada sesuatu pun yang boleh menghalang rakyat jelata dalam perjuangan ini, atau yang boleh melemahkan semangat tinggi rakyat bagi

..10/-

menunaikan tanggungjawab dan kewajipan mereka kepada negara.

Ampun Tuanku,

10. Patek pacal sekelian sentiasa sedar, bahawa hanya dengan BERSATU usaha dan tenaga, serta bermuafakat dan persefahaman, keamanan dan ketenteraman yang diperolehi sekarang ini dapat terus dikekalkan. Inilah hasrat dan cita-cita patek sekelian, bagi menjayakan pelaksanaan rancangan pembangunan, serta memesatkan kegiatan ekonomi negara bagi

membolehkan rakyat hidup dengan lebih makmur dan bahagia lagi. Mudah-mudahan dengan berkat daulat Tuanku, Allah Subhanahu Wataala akan memakbulkan segala usaha dan cita-cita suci patek pacal sekelian. Amin Ya Rab-bul Alamin.

11. Akhirnya, patek bagi pihak Kerajaan dan rakyat jelata, sekali lagi menyembah junjung kasih Ke bawah Duli Tuanku serta berdo'a kehadiran Tuhan Rabbul 'Alamin, semuga dikurniakan kepada ke bawah Duli Tuanku, dan juga kepada Duli Yang Maha Mulia Seri Paduka

Baginda Raja Permaisuri Agong, kesihatan yang berkekalan serta dilanjutkan usia zaman Kebawah Duli Baginda berdua, dan dianugerahinya dengan selamat sejahtera dan aman sentosa buat selama-lamanya.

Ampun Tuanku sembah patek harap diampun.



No Siri 368
No Penerimaan 120/78